



**TAARIFA YA MKURUGENZI MKUU WA MAMLAKA YA SERIKALI MTANDAO
(e-GA) ENG. BENEDICT NDOMBA KWA WAZIRI WA NCHI, OFISI YA RAIS,
MENEJIMENTI YA UTUMISHI WA UMMA NA UTAWALA BORA MHE.
GEORGE SIMBACHAWENE (MB) WAKATI WA MAKABIDHIANO YA MFUMO
WA KIELETRONI WA USIMAMIZI WA KESI (CMIS) PAMOJA NA TOVUTI YA
OFISI YA TAIFA YA MASHTAKA**

TAREHE 23 AGOSTI, 2023.

Mhe. George Simbachawene (Mb); Waziri wa Nchi, Ofisi ya Rais, Menejimenti ya Utumishi wa Umma na Utawala Bora,

Mhe. Pauline Philipo Gekul (Mb); Naibu Waziri Katiba na Sheria,

Ndg. Mary Gasper Makondo; Katibu Mkuu, Wizara ya Katiba na Sheria,

Ndg. Xavier Daudi; Naibu Katibu Mkuu, Ofisi ya Rais, Menejimenti ya Utumishi wa Umma,

Ndg. Sylvester Mwakitalu; Mkurugenzi wa Mashitaka (DPP)

Ndg. Javelin Rugaihuruza; Kaimu Naibu Mkurugenzi wa Mashtaka,

Ndg. Priscus Kiwango; Mkurugenzi wa TEHAMA Serikalini, Ofisi ya Rais, Menejimenti ya Utumishi wa Umma na Utawala Bora,

Prof. Aloyce Mvuma; Mjumbe wa Bodi ya Wakurugenzi ya Mamlaka ya Serikali Mtandao (e-GA)

Menejimentii na Watumishi wa Ofisi ya Taifa ya Mashitaka (NPS) na Mamlaka ya Serikali Mtandao (e-GA),

Wageni Waalikwa, Wanahabari,

Mabibi na Mabwana;

Nawasalimu kwa jina la Jamhuri ya Muungano wa Tanzania,

Awali ya yote, namshukuru Mwenyezi Mungu kwa kutuwezesha kukutana hapa leo katika hafla hii maalum ya makabidhiano ya Mfumo wa Kieletroni wa Usimamamizi wa Kesi ujulikanao kama '**Case Management Information System**' (CMIS), pamoja na **Tovuti ya Ofisi ya Taifa ya Mashtaka.**

Waheshimiwa Mawaziri, napenda kutumia nafasi hii kuwashukuru kwa kuitikia wito wetu wa kushiriki nasi katika tukio hili muhimu. Tunafahamu kuwa mnayo majukumu mengi lakini kwa umuhimu wa tukio hili mmeona ni vyema kutenga muda ili mshiriki nasi. Tunawashukuru sana na tunawakaribisha.

Kwa ujumla niwashukuru Viongozi na Watumishi wote kutoka Ofisi ya Taifa ya Mashitaka (NPS) na Mamlaka ya Serikali Mtandao (e-GA) pamoja na Waandishi wa Habari kwa kushiriki nasi katika hafla hii muhimu ikiwa ni sehemu ya jitihada za kukuza Serikali Mtandao.

Ndugu Mgeni rasmi,

Mamlaka ya Serikali Mtandao (e-GA), ni Taasisi ya Umma yenye jukumu la kuratibu, kusimamia na kukuza jitihada za Serikali Mtandao, pamoja na kuhimiza uzingatiaji wa Sheria, Kanuni, Viwango na Miongozo ya Serikali Mtandao, ili kuhakikisha Taasisi za Umma zinatumia TEHAMA kwa usahihi na usalama.

Katika utekelezaji wa jitihada za kukuza Serikali Mtandao nchini, Mamlaka hushirikiana na Taasisi nyingine za Umma katika kusanifu na kujenga Mifumo

mbalimbali ya TEHAMA, kwa lengo la kuboresha utendaji kazi ndani ya Taasisi hizo na utoaji wa huduma kwa umma.

Ndugu Mgeni rasmi,

Mamlaka ya Serikali Mtandao (e-GA) kwa kushirikiana na Ofisi ya Taifa ya Mashtaka (NPS) imesanifu, kujenga na kusimamia uendeshaji wa mfumo wa ***Kieletroni wa Usimamamizi wa Ushughulikiaji wa Kesi*** ujulikanao kama ***Case Management Information System (CMIS)***.

Lengo la mfumo huu ni kuratibu shughuli zinazofanywa na Ofisi ya **NPS**, ambazo ni kufungua na kusimamia uendeshaji wa kesi za jinai nchini, hivyo, mfumo unakusanya, kuchakata na kutunza taarifa za kesi za jinai. ***Mpaka sasa kesi za jinai zaidi ya 17,411 zimeshasajiliwa katika mfumo huu ambapo kati ya hizo, kesi 7,361 zimeshafika mwisho na kutolewa hukumu wakati kesi 10,050 zipo katika hatua mbalimbali za kufanyiwa kazi.***

Aidha, mfumo huu umejengwa kwa lengo la kurahisisha upatikanaji wa taarifa sahihi zinazohusu uendeshaji wa mashtaka na kusaidia katika uandaaji wa mipango ya ofisi na utoaji maamuzi mbalimbali pamoja na uandaaji wa taarifa zinazowasilishwa kwenye mamlaka nyingine.

Ikumbukwe kuwa, utekelezaji wa jitihada za Serikali Mtandao ni moja ya maeneo muhimu ya maboresho yaliyofanyika na yanayoendelea kutekelezwa katika Utumishi wa Umma, ambayo yamesaidia kuboresha utendaji kazi na utoaji wa huduma kwa Umma.

Hivyo, ujenzi wa mfumo huu ni muendelezo wa jitihada za Mamlaka za kuhakikisha Taasisi za Umma zinatumia vyema TEHAMA katika kuboresha utendaji kazi na utoaji wa huduma kwa Umma.

Ndugu Mgeni rasmi,

Itakumbukwa kuwa, lengo la **Rais wa Jumhuri ya Muungano wa Tanzania, Mhe. Dkt. Samia Suluhu Hassan** ni kuwa na Serikali ya Kidijitali inayofanya kazi kwa

ufanisi na kutoa huduma bora kwa umma pamoja na kutoa mchango katika maendeleo ya taifa letu. Kwa kuzingatia azma hiyo, Mamlaka ya Serikali Mtandao (e-GA) itaendelea kuziwezeshi Taasisi za Umma kutumia TEHAMA katika kuboresha utekelezaji wa majukumu yao ya kila siku na kutoa huduma bora kwa Umma.

Aidha, Mhe. Rais ametuelekeza tuimarisha matumizi ya TEHAMA ili kwenda sambamba na Mapinduzi ya Nne ya Viwanda ambayo yamepelekea shughuli nyingi duniani zikiwemo za kiuchumi kwa sasa kufanyika kwa kutumia TEHAMA.

Hivyo, niwahakikishie kuwa, e-GA itaendela kufanya tafiti ili kuleta bunifu za Mifumo ya TEHAMA itakayoliwezesha Taifa kufanikiwa kuimarisha utendaji katika sekta mbalimbali, ikiwemo sekta ya Katiba na Sheria ili kuendeleza taifa letu.

Mamlaka ya Serikali Mtandao, imejipanga kufanya mageuzi katika utoaji wa huduma mtandao, sanjari na hilo tumejipanga kutekeleza kikamilifu matakwa ya kisheria, pamoja na maelekezo ya Mh. Rais ya kuhakikisha mifumo ya TEHAMA inawasiliana na kubadilishana taarifa. Hivyo, mfumo huu umeunganishwa na Mfumo wa Serikali wa Kuwezesha Mifumo ya TEHAMA kubadilishana Taarifa unaojulikana kama **Government Enterprise Service Bus (GovESB)**. Mpaka sasa, Mfumo huu unaokabidhiwa leo tayari umeunganishwa na mifumo ya Polisi na TAKUKURU na Mahakama.

Mwisho, niwaahidi kuwa, Mamlaka ya Serikali Mtandao (e-GA) itaendelea kushirikiana na Taasisi za Umma katika kuhakikisha inajenga Mifumo inayotatua changamoto tulizonazo ili kufanikisha dhana nzima ya Serikali ya kidigitali.

Ndugu Mgeni rasmi,

Baada ya kusema hayo naomba kuhitimisha kwa kuwashukuru tena wote mliahudhuria tukio hili.

Asanteni sana kwa kunisikiliza